

Babad Saka Kitab Sutji.pdf/21



Diekspor dari Wikisource pada 12 November 2024

Kaca iki wis divalidasi

GUSTI JÉSUS JUSWA ROLAS TAUN
KASOWANAKÉ ING PADALEMAN SUTJI

23

Jusup lan Marjam dadi *kuwatir* banget. Lah gèk ana ing ngendi putrané? Mangka sedéla engkas srengéngéné wis surup, lan kafilah mau ora lèrèn nggolèki botjah ketriwal, saja manèh mung botjah saka désa Nasarèt, mesti ora digapé.

Bareng wis tita jèn putrané ora katut ana ing kafilah kono, Jusup lan Marjam tjengkélak bali menjang Jerusalèm; atiné ngandut samar lan sumelang. Wajahé wis bengi. Dalané peteng tur adoh lan ora sepi ing bebaja. *Wong loro* mau mung tansah nutuh awaké déwé, déné kurang waspada enggoné pađa ngulataké putrané. Iku babar pisan dudu luputé Jésus, wiwit timur mula *ora tau* duwé kenakalan, anané mung tansah manut miturut marang wong tuwané. Jusup lan Marjam tjeťa jèn luput, djalaran sadurungé buďal saka Jerusalèm kuduné rak wis ngerti, jèn putrané *durung* mèlu ngumpul ana ing tjeďaké gapura. Lah saiki bandjur keprijé?

Lah jèn botjahé ketjilakan ana ing dalan, utawa kesasar, utawa katut kafilah lijané, bandjur keprijé? Lah jèn botjahé ngantia kepeťuk karo kéwan galak, bandjur! Dalané sepi njenjet tur ora aman. Jusup lan Marjam mung tansah ketir-ketir atiné Lakuné diterusaké, nganti tekan Jerusalèm, nanging ana ing dalan ora kepeťuk karo putrané. Sawengi

natas enggoné nggolèki ora nganti lèrèn, ésuké kuṭa
Jerusalèm diubres saka lor mengidul, saka wétan mengulon,
saben wong ditakoni, saben omah dileboni, nanging putrané
ora ketemu. Kaja mengkono mau enggoné paḍa nggolèki
putrané rong dina rong bengi. Saben panggonan kang
diampiri, diparani manèh karo takon-takon marang sapa baé
sing diwanuhi. O, bok ja ana sing weruh utawa awèh weruh
bab putrane! Nanging Jusup lan Marjam meksa *durung*
ketemu karo putrané.

Bareng telung dinané, Jusup lan Marjam wis tekan ing
padaleman sutji. Ora ketemu ing nalar, jèn putrané isih ana
ing *kono*, Jusup lan Marjam durung nganti nggolèki ana ing
djero padaleman sutji. Gèk apa perluné botjah tjilik
kajadéné putrané mlebu ing padaleman sutji, panggonané
wong tuwa-tuwa lan para ahli kitab? Ah, *mesti* putrané ora
ana ing kono. Nanging supaja adja ketanggungan enggoné
kangèlan lan supaja lega atiné, Jusup lan Marjam ija
bandjur mlebu ing padaleman sutji. Enggoné nggolèki wis
mèh kemptu, ing palataran, bandjur ing kamar-kamar turut
èmpèran, bandjur wekasané tekan ing kamar
panggonané para ulama lan para ahli kitab.

Lah kaé!

Dumadakan Marjam bandjur madju ngesuk, sing dadi
golèkan saiki wis ketemu.

Putrané tinemu lingguh ing tengah-tengahé para ulama lan ahli kitab. Marjam ora ngrungu sowal-djawabé para ahli mau karo putrané sing lagi umur rolas taun, ija ora ngingetaké ulaté wong-wong tuwa mau sing pada kagum njawang putrané sing senadjan isih botjah, wis kadunungan kawitjaksanaan sing ngéram-éramaké, ketitik saka enggoné nakokaké prakara warna-warna sing tumrapé para ahli mau isih awudjud kekeran ... Kabèh mau sing sarwa élok lan aèng ora dirèwès, ora taha-taha putrané bandjur dirangkul sarta diarasi kambi nangis; mbrebel wetuning eluhé, nanging eluhing kabungahan, djalaran putrané sing dinjana ilang, wis ketemu manèh!

Udjaré Marjam: „Enggèr, jagéné kowé teka mengkono marang aku? Lah bapakmu karo aku pada nggolèki kowé karo was-was.” Marjam pantjèn wis ngerti, jèn putrané enggoné tumindak mengkono mau ora kagawa saka *pamurangsaraké*.

Aturé Jésus marang rama ibuné: „Kadospundi déné sampéjan ngantos sami ngupadosi kula, sampéjan punapa boten sumerep bilih kula kuwadjiban wonten ing dalemipun Rama kula?”, kambi njawang ibuné klawan welas asih, éstané kaja arep ngélingaké: „Bu, punapa ibu sampun kesupèn bilih Gusti Allah punika sadjatosipun Rama kula? O, ibu, taksih wonten pinten-pinten prakawis malih ingkang ndjalari trenjuhing galhipun ibu, margi saking anggèn kula kedah ngéstokaken kersanipun Rama kula.”

Para ahli kitab mau mung pađa kedjuđegan. Kerep baé ana botjah lan wong nonoman pađa meguru mrono, nanging durung tau mrangguli botjah sing kalantipan lan wangsulané ngèmperi Jésus. Apa tumon ana botjah sing lagi semono umuré wis duwé kalantipan ngungkuli para ahli? Mangka saiki, keprijé wangsulané marang ibuné? Djaréné duwé kuwajiban ana ing padaleman sutji, ana ing dalemé Ramané? Sapa ta Ramané botjah iku? Lan apa ta kuwajibané? Para ahli kitab mau mung pađa gèdèg-gèdèg, awit pada ora njandak eliding pangandikané iku mau.

Lan Jusup lan Marjam? Pađa déné enggoné ora njandak, senadjan sakaroné wis pađa ngerti sapa sing djumeneng Ramané, nanging ija durung ngerti Jésus mau ing tembé bakal dadi apa utawa bakal nindakaké apa ing sadjeroning sugengé.

SAWISE mengkono Jusup lan Marjam bandjur mulih menjang Nasarèt, lan Jésus tumuli tumut kang rama lan kang ibu, tansah sumujud ing wong tuwané. Jésus saja mindak-mindak agengé, lan saja wuwuh olèh sihé para mitra karuhé. Pagawéané saben dina mbijantu pagawéané wong tuwané, lan bok-

About this digital edition

This e-book comes from the online library [Wikisource](#)^[1]. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](#)^[2] license or, at your choice, those of the [GNU FDL](#)^[3].

Wikisource is constantly looking for new members. During the realization of this book, it's possible that we made some errors. You can report them at [this page](#)^[4].

The following users contributed to this book:

- Tielumphd
- Thersetya2021
- Bennylin

1. [↑ https://wikisource.org](https://wikisource.org)
2. [↑ https://www.creativecommons.org/licenses/by-sa/3.0](https://www.creativecommons.org/licenses/by-sa/3.0)
3. [↑ https://www.gnu.org/copyleft/fdl.html](https://www.gnu.org/copyleft/fdl.html)
4. [↑ https://wikisource.org/wiki/Wikisource:Scriptorium](https://wikisource.org/wiki/Wikisource:Scriptorium)